



Broj: 01-50-1-54-56/05.
Sarajevo, 4. maja 2005.

ZAPISNIK

56. sjednice Predstavničkog doma
Parlamentarne skupštine Bosne i Hercegovine,
održane 4. maja 2005. godine

Sjednica je počela u 10,55 sati. Prisustvovalo je 37 poslanika. Opravdano su odsustvovali: Seada Palavrić, Abdulah Nakaš, Adem Huskić, Marija Perkanović i Selim Bešliagić.

Iz Vijeća ministara sjednici su prisustvovali: ministar Bariša Čolak i zamjenici ministara Dragan Mektić, Marina Pendeš, Haris Bašić i Ivica Marinović.

Iz međunarodnih organizacija sjednicu su pratili: Sanja Stevanović – OHR, Amra Alispahić-DEI i Ivana Jusufbegović – EUPM.

Predsjedavajući Doma Šefik Džaferović dao je kraće uvodne napomene u vezi s prijedlogom dnevnog reda.

Vinko Zorić predložio je da se dnevni red dopuni uvrštavanjem rasprave o ustavnosti odluka visokog predstavnika za Bosnu i Hercegovinu. Naglasio je da je to zaključak Predsjedništva HDZ-a.

Beriz Belkić rekao je da sama formulacija koju je iznio Zorić - da se raspravlja o ustavnosti odluka visokog predstavnika - upućuje da je to u nadležnosti Ustavnog suda, te da, stoga, Klub Stranke za BiH neće podržati taj prijedlog.

Dom se izjasnio o prijedlogu Vinka Zorića za dopunu dnevnog reda. Za je glasalo 12, protiv 13, suzdržalo se 6 poslanika.

Predsjedavajući je konstatirao da prijedlog nije usvojen, pa je proglasio da 56. sjednica ima sljedeći

DNEVNI RED

1. Zapisnik 55. sjednice Predstavničkog doma,
2. Poslanička pitanja i odgovori,
3. Popunjavanje upražnjenog mjesta člana Predsjedništva BiH iz reda hrvatskog naroda,
4. Zahtjev poslanika Mirsada Ćemana za razmatranje Prijedloga zakona o osnovama geomatike Bosne i Hercegovine po hitnom postupku, u skladu s članom 104. Poslovnika,
5. Izvještaj Komisije Kolegija o nastojanju za postizanje sporazuma o zahtjevu Vijeća ministara za razmatranje Prijedloga zakona o izmjenama i dopunama Zakona o policijskim službenicima Bosne i Hercegovine po hitnom postupku, u skladu s članom 105. Poslovnika,
6. Izvještaj Komisije Kolegija o nastojanju za postizanje sporazuma o prijedlogu zaključka poslanika Adema Huskića povodom razmatranja Izvještaja o obavljenim posjetama institucijama BiH iz oblasti odbrane i sigurnosti,
7. Prijedlog zakona o pravima i dužnostima članova Parlamentarne skupštine BiH, sa Izvještajem Ustavno-pravne komisije,

8. Prijedlog zakona o izmjenama i dopunama Zakona o zaštiti prava pripadnika nacionalnih manjina, sa Izvještajem Komisije za ljudska prava, imigraciju, izbjeglice i azil (predlagači: poslanici Martin Raguž, Mirsad Ćeman, Selim Bešliagić),
9. Prijedlog rezolucije o antifašizmu (predlagači: poslanici Zlatko Lagumdžija, Jozo Križanović, Selim Bešliagić),
10. Prijedlog tumačenja na zahtjev Komisije za razmatranje statusa osoba naturaliziranih poslije stupanja na snagu Ustava BiH do stupanja na snagu Zakona o državljanstvu Bosne i Hercegovine,
11. Davanje saglasnosti za ratifikaciju:
 - a) Sporazuma između Vlade Republike Bosne i Hercegovine i Vlade Republike Mađarske o saradnji po pitanjima borbe protiv terorizma,
 - b) Sporazuma o transferu i prihvatu osoba na državnoj granici između Vlade Republike Bosne i Hercegovine i Vlade Republike Mađarske,
 - c) Sporazuma između Vijeća ministara BiH i Vlade Republike Bugarske o ukidanju viza za nosioce diplomatskih i službenih pasoša,
 - d) Sporazuma između Bosne i Hercegovine i Republike Slovenije o uzajamnoj pomoći po pitanjima carina,
 - e) Sporazuma o unapređenju i zaštiti investicija između Bosne i Hercegovine i Kraljevine Danske,
 - f) Šestog amandmana na Ugovor o finansijskoj pomoći između Bosne i Hercegovine i Sjedinjenih Američkih Država – za općinsku infrastrukturu i usluge.

Ad – 1: Zapisnik 55. sjednice Predstavničkog doma

Ljiljana Milićević primijetila je da je u Zapisniku napravljena tehnička greška, jer je navedeno da je sjednici prisustvovalo 40, a odsustvovala četiri poslanika, što ne odgovara ukupnom broju poslanika u Predstavničkom domu.

S ovom primjedbom Zapisnik 56. sjednice usvojen je jednoglasno.

Ad – 2: Poslanička pitanja i odgovori

Predsjedavajući je konstatirao da su odgovore za ovu sjednicu dobili poslanici: Muhamed Moranjkić, Ljiljana Milićević, Ivo Lozančić i Milorad Živković.

Odgovore su komentirali: Ljiljana Milićević i Muhamed Moranjkić.

Mladen Potočnik izrazio je protest što nije dobio odgovor na pitanje postavljeno na prošloj sjednici u vezi s polaganjem zakletve regruta na Manjači i u Bileći.

Nova poslanička pitanja postavljena su kako slijedi:

Nikola Špirić:

«Već dugi niz godina u BiH je prisutna, i u RS i u Federaciji BiH, diskriminacija prava djece s mentalnom retardacijom i njihovih porodica. Naravno da su ta prava regulirana u Deklaraciji o pravima mentalno zaostalih osoba, ...a pozivam se i na Izvještaj o obrazovanju BiH 2004/2005. koji je sačinio OSCE i koji upozorava na diskriminaciju djece s mentalnom retardacijom i u jednom i u drugom entitetu... Zato je moje pitanje Vijeću ministara – šta namjeravaju učiniti kako bi ova oblast bila zakonski uređena na nivou države i kako bi ova populacija jednostavno zakonski bila šticeana, odnosno kako ne bi bilo diskriminacije?»

Mirsad Ćeman:

«1. Na osnovu kojeg propisa je pod imenom "Merhamet" i na istoj adresi u Sarajevu registrirano novo humanitarno društvo, iako pod imenom "Merhamet", (zaštićeno ime) i na istoj adresi već više od 10 godina djeluje obnovljeno Društvo "Merhamet", koje baštini i predstavlja kontinuitet Društva "Merhamet", osnovanog početkom 20. stoljeća?

2. Kojim aktom, čijom odlukom i pod kojim uslovima je, ako sam dobro informiran, Elektroprivredi Republike Hrvatske dato na korištenje, izgleda i u vlasništvo, Buško jezero i postrojenja u njemu, dakle njegov hidropotencijal, te da li se i šta poduzima da BiH i njeni građani gospodare ovim značajnim privrednim resursom?

3. Da li je moguće, s obzirom na stepen opremljenosti savremenom računarskom tehnologijom i opremom, ovjeru zdravstvenih knjižica vršiti na osnovu uvida u bazu podataka koja se vodi umjesto insistiranja na pokazivanju lične karte, kada ovjeru, umjesto osiguranika, odnosno nosioca osiguranja traži osigurano lice koje nije nosilac osiguranja? Ovo pitam iz praktičnih razloga, zapravo na inicijativu građana koji se pitaju zašto nam savremena oprema služi ako neće pojednostaviti ostvarivanje prava građana i procedure."

Hazim Felić:

«Pitanje Upravi za indirektno oporezivanje – direktoru – da li je Uprava za indirektno oporezivanje popunjena u skladu sa Zakonom i ako nije, kada će biti, te da li su i njeni regionalni centri također popunjeni u skladu sa zakonom?»

Sead Avdić:

«Molim Kolegij Predstavničkog doma PSBiH da omogući cjelovitu informaciju s razgovora predsjedavajućeg Vijeća ministara i drugih učesnika u razgovorima (Predsjedništvo BiH) s kancelarom SR Njemačke Gerhardom Šrederom.»

Mladen Potočnik protestirao je što nije dobio odgovor na pitanje postavljeno na prošloj sjednici, kada je tražio izvještaj o događajima u Bileći i Manjači prilikom polaganja zakletve regruta.

Petar Kunić podsjetio je da je prije mjesec-dva postavio pitanje vezano za Upravu za indirektno oporezivanje i još nije dobio odgovor. Zamolio je da Kolegij intervenira kako bi dobio odgovor na postavljeno pitanje.

Ad – 3: Popunjavanje upražnjenog mjesta člana Predsjedništva BiH iz reda hrvatskog naroda

U uvodu predsjedavajući Džaferović upoznao je poslanike s odredbama Zakona o popunjavanju upražnjenog mjesta člana Predsjedništva BiH koje se tiču procedure imenovanja u Predstavničkom domu.

Poslije uvodnih napomena predsjedavajući Kluba HDZ-Demokršćani Vinko Zorić zatražio je pauzu od pola sata radi zasjedanja Kluba. Međutim, pauza je potrajala mnogo duže.

Poslije pauze poslanicima je podijeljen prijedlog Predsjedništva HDZ-a u pisanoj formi, da se za člana Predsjedništva BiH imenuje Ivo Miro Jović.

Na zahtjev jednog broja poslanika, predsjednik HDZ-a Bariša Čolak kratko je obrazložio prijedlog.

U raspravi o ovoj tački učestvovali su: Beriz Belkić, Zlatko Lagumdžija, Nijaz Duraković, Nikola Špirić, Momčilo Novaković i Vinko Zorić.

Poslije rasprave predsjedavajući je napomenuo da su u glasanju relevantni glasovi "za", pa je pozvao poslanike na izjašnjenje. Kako su među poslanicima izražene nejasnoće, predsjedavajući je zatražio da sekretar Doma pojasni način glasanja.

Sekretar Doma Branka Todorović pročitala je odredbu Zakona koja propisuje način glasanja i naglasila da će glasovi koji su "za" odlučiti o imenovanju člana Predsjedništva, a da glasovi koji su "protiv" i "suzdržani" ne utiču na rezultat.

Zlatko Lagumdžija nije se složio s objašnjenjem sekretara Doma. Istaknuo je, uz ostalo, da mu nije logično da bi kandidat bio imenovan ukoliko bi bilo više glasova "protiv" nego glasova "za".

Predsjedavajući Džaferović rekao je da misli da je način glasanja sasvim jasan i da smo do sada u više navrata imali ovakvu praksu, pa je proveo glasanje.

"Za" prijedlog je glasalo 10, "protiv" devet, a "suzdržanih" je bilo pet poslanika.

Predsjedavajući je konstatirao da je za člana Predsjedništva BiH iz reda hrvatskog naroda imenovan Ivo Miro Jović. U ime Doma i u svoje ime uputio je čestitke Ivi Miri Joviću. Zatim je dao pauzu od pet minuta radi čestitanja novom članu Predsjedništva BiH.

Poslije pauze nastavljen je rad po usvojenom dnevnom redu.

Ad – 4: Zahtjev poslanika Mirsada Ćemana za razmatranje Prijedloga zakona o osnovama geomatike Bosne i Hercegovine po hitnom postupku, u skladu s članom 104. Poslovnika

Mirsad Ćeman, u svojstvu predlagača, kratko je obrazložio Prijedlog zakona.

Za zahtjev za proceduru glasalo je 16, protiv 12 poslanika. Kako su iz Republike Srpske za glasala samo dva poslanika, proveden je postupak usaglašavanja u Komisiji Kolegija. Nije bilo saglasnosti, pa je proveden drugi krug glasanja, kada je iz Republike Srpske "protiv" glasalo 10 poslanika, što je 2/3 iz entiteta.

Predsjedavajući je konstatirao da nije usvojen zahtjev za hitni postupak, pa će se Prijedlog zakona razmatrati u redovnoj proceduri.

Ad – 5: Izvještaj Komisije Kolegija o nastojanju za postizanje sporazuma o zahtjevu Vijeća ministara za razmatranje Prijedloga zakona o izmjenama i dopunama Zakona o policijskim službenicima Bosne i Hercegovine po hitnom postupku, u skladu s članom 105. Poslovnika

Predsjedavajući je podsjetio da u Komisiji Kolegija nije postiguna saglasnost, pa je zahtjev Vijeća ministara dao na glasanje u drugom krugu.

I ovom prilikom iz Republike Srpske "protiv" je glasalo 10, pa, prema tome, nije usvojen zahtjev Vijeća ministara da se Prijedlog zakona o izmjenama i dopunama Zakona o policijskim službenicima BiH razmatra po hitnom postupku. Predsjedavajući je konstatirao da ovaj zakon ostaje na snazi, s obzirom da se radi o zakonu koji je na privremenoj osnovi proglasio visoki predstavnik.

Ad – 6: Izvještaj Komisije Kolegija o nastojanju za postizanje sporazuma o prijedlogu zaključka poslanika Adema Huskića povodom razmatranja Izvještaja o obavljenim posjetama institucijama BiH iz oblasti odbrane i sigurnosti

Ni o prijedlogu zaključka iz ove tačke nije bilo saglasnosti u Komisiji Kolegija.

U drugom krugu glasanja "protiv" zaključka iz Republike Srpske glasalo je 10 poslanika.

Predsjedavajući je konstatirao da predloženi zaključak nije usvojen.

Ad – 7: Prijedlog zakona o pravima i dužnostima članova Parlamentarne skupštine BiH, sa Izvještajem Ustavno-pravne komisije

U uvodnim napomenama predsjedavajući je, uz ostalo, rekao da nadležna komisija nije podržala principe predloženog zakona, pa je Izvještaj Komisije dao na glasanje.

"Za" Izvještaj je glasalo 16, "protiv" 11, "suzdržana" su bila dva poslanika. Iz Federacije "za" je glasalo 11, iz Republike Srpske pet. Prema tome, Dom je usvojio Izvještaj Komisije. Predsjedavajući je konstatirao da je ovim pao Prijedlog zakona o pravima i dužnostima članova Parlamentarne skupštine.

Ad – 8: Prijedlog zakona o izmjenama i dopunama Zakona o zaštiti prava pripadnika nacionalnih manjina, sa Izvještajem Komisije za ljudska prava, imigraciju, izbjeglice i azil (predlagači: poslanici Martin Raguž, Mirsad Ćeman, Selim Bešliagić)

U uvodnim napomenama predsjedavajući Džaferović rekao je da je nadležna komisija podržala principe, ali nije podržala Prijedlog zakona u cjelini.

U raspravi je učestvovao Mirsad Ćeman, u svojstvu predlagača. Pored ostalog, skrenuo je pažnju na tekst koji je poslanicima dostavio Centar civilnih inicijativa, te je apelirao na poslanike da ne prihvate Izvještaj Komisije.

Prilikom glasanja "za" izvještaj glasalo je 12, "protiv" 19 poslanika.

Predsjedavajući je konstatirao da Izvještaj Komisije nije usvojen i da se Komisiji daje novi rok od 30 dana.

Ad – 9: Prijedlog rezolucije o antifašizmu (predlagači: poslanici Zlatko Lagumdžija, Jozo Križanović, Selim Bešliagić)

Predsjedavajući Džaferović konstatirao je da je Klub SDP-a, prema zaključku Doma s prošle sjednice, dostavio novi tekst Rezolucije.

Kratko je povodom ove tačke diskutirao Beriz Belkić, a zatim se Dom izjasnio o Prijedlogu rezolucije.

"Za" je glasalo 29, a tri poslanika bila su "suzdržana".

Predsjedavajući Džaferović konstatirao je da je Predstavnički dom usvojio Rezoluciju o antifašizmu.

Ad – 10: Prijedlog tumačenja na zahtjev Komisije za razmatranje statusa osoba naturaliziranih poslije stupanja na snagu Ustava Bosne i Hercegovine do stupanja na snagu Zakona o državljanstvu Bosne i Hercegovine

Predsjedavajući Džaferović upoznao je poslanike o tome da ga je predsjedavajući Ustavno-prvne komisije obavijestio da Komisija nije imala vremena završiti posao u vezi s ovom tačkom, pa je predložio da se tačka odgodi za narednu sjednicu Doma i da se tada mora završiti.

Prijedlog predsjedavajućeg je prihvaćen.

Predsjedavajući je pozvao Ustavno-pravnu komisiju da do naredne sjednice završi ovaj posao. Također je pozvao Komisiju za saobraćaj i komunikacije i Komisiju za finansije i budžet da završe svoj dio posla na Zakonu o Javnom RTV sistemu i Zakonu o zaduživanju, dugu i garancijama, kako bi se mogli razmatrati na narednoj sjednici.

Ad – 11: Davanje saglasnosti za ratifikaciju:

- a) Sporazuma između Vlade Republike Bosne i Hercegovine i Vlade Republike Mađarske o saradnji po pitanjima borbe protiv terorizma,
- b) Sporazuma o transferu i prihvatu osoba na državnoj granici između Vlade Republike Bosne i Hercegovine i Vlade Republike Mađarske,
- c) Sporazuma između Vijeća ministara Bosne i Hercegovine i Vlade Republike Bugarske o ukidanju viza za nosioce diplomatskih i službenih pasoša,
- d) Sporazuma između Bosne i Hercegovine i Republike Slovenije o uzajamnoj pomoći po pitanjima carina,
- e) Sporazuma o unapređenju i zaštiti investicija između Bosne i Hercegovine i Kraljevine Danske,

- f) Šestog amandmana na Ugovor o finansijskoj pomoći između Bosne i Hercegovine i Sjedinjenih Američkih Država – za općinsku infrastrukturu i usluge.

Nije bilo rasprave u okviru ove tačke.

Sa 29 glasova "za" i tri "suzdržana", Dom je dao saglasnost za ratifikaciju akata od a) do f).

Ovim je realiziran dnevni red 56. sjednice.

Sjednica je završena u 15,10 sati.

Sastavni dio Zapisnika je transkript sjednice.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Šefik Džaferović